



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

Russia Tir Putin-i Trump
tenüng asanger

Venus Williams nem US Open
atema Wild Card agütsüogo



VOL. XXII ISSUE NO. 301 (ADOK 301)

DIMAPUR

ROGONÜ (FRIDAY)

LUROI (AUGUST) 15, 2025

₹ 5.00

Kohima nung 79th I-Day amungba live sayutsü

Dimapur, Luroi/August 14 (TYO): Kohima nung 79 buba Independence Day 2025 anogomung amungba nüburtemi reprangtsü asoshi live stream asütsü.

YouTube nung iba sentong live stream ya <https://www.youtube.com/live/g-DndyLL6ck?si=RpNb7rb9owZhfcXc> nung reprangtetsü.

Old KMC dumping area nung NH-29 anenzüka ogo

Kohima, Luroi/August 14 (TYO): Tzünglu tanen makai kanga sashia aruba ajanga Bodhbarnep 3:00 aser 4:00 ako tsüngta old Kohima Municipal Council (KMC) dumping area nung alinen tuluka alua lenmang meters ishika anenzüka oa gari tem senzüsempo mesüteti akum.

Public Works Department (PWD) nungi ketdangsürtem aser National Highway authorities iba tesem nung lenmang yanglushiba mapa inyaktar.

Kasa mapang Kohima aser Dimapur tsüngta senzüba gari tem Jotsoma lenmang leni senzüdaktsür.

79th Naga I-Day nung NSF-i telungjemnungalitsü ayongzük

Kohima, Luroi/August 14 (TYO): Tanü Naga Solidarity Park, Kohima nung Naga Students' Federation (NSF) ajanga 79 nuba Naga Independence Day munga asen otsüla-oboula nung mapa tajung maneni amshitsü aser Naga nung tarutsü nung telungjem aser yimchiyimjung nung alitsü asoshi ayongzüka liasü.

Asen otsüla-oboula nungeri amshiba tasü tait aser telungjem senmang asenoki mesamadaktsü amshitsü aser Naga nung ajunga tesunep aser yimchiyimjung nung alitsü asoshi tarutsü tia yangertsüla, ta pai ayongzük.

Sentong tembanga jembidang NSF repsem zülur Kenilo Kent-i nükla tajung ayuba lenirtem aser linük asoshi takum bendanga agütsür nem tetushi agütsü.

Iba anogomung ya tesüiba mapang bilemtetba indang masü saka telungjem aser kati ka den tangatetep nung alitsü asoshi inyaktsü ayongzüka anogomung ka asütsüla, ta ashi.

Naga nung tarutsü tia ya yimtenren tsütsü jembishinüba kisüng nung masü saka kin aser tesem balala tsüngta tamang akaba aser angatetepba apu yangluba, lokti tentet shia tashi aliba angatetba aser Naga nung kibong ka ama tejakleni mera aoba nunga lir, ta Kent-i ashi.

Tsarü yimdak 'Tsang-Rii Mübü' benjong kanga longsoa amung

Mokokchung, 14 Aug (TYO): Tuensang district kübok aliba Sangtamer yim Tsarü yimdak Aug 14 nü “Tsang-Rii Mübü” benjong kanga longsoa mungogo. Iba sentong nung telok balalai akhi tsürabur yimya nung kin sobutsü meraketa sobur sobaliba kentenmenü aser yar tsüngsang balala ia benjongmunger kanga longsoep.

benjong pelatepa mungtettba asoshi Tsüngrem tenüng asanger aser ibai ni aser ozü kibong atema dang masü yimmasanger asoshia temoatsü tulu ta agizükür”, ta pai ashi.

Pai FNT dak sentakba olen kar lemsatepdang, Naga nung ya anaben lemsa, mezügbubaji India nung nüchiso angudang Burma nung Naga kin tuluka yutsü aser tanabubaji Nagaland statehood angudang, tang aliba asenok tilaba yutsür kar Manipur, kar Assam aser kar Arunachal Pradesh state-tem nung perokshia yutsü, ta ashi. Tanü FNT indang kanga bulua jembir, saka ibai asenok pilatsü/ lemdangtsü atema jembir masü aser aikadi Nagaland ana lemdangtsü amai angateter, saka aji masü, “FNT arung taru asenok tanü koma külemi meimtepa alir yamaji dang aotsü”, ta paisa ashi.

(Tapak 2 nung...)

Tesem balala nung 79 buba Naga Independence Day mungogo

Dimapur, Luroi/August 14 (TYO): Brehostibarnü Naga political groups balalai pei indang headquarters nung 79 buba Naga Independence Day mungogo.

Kheoyi designate camp nung adenshia alirtem den jembidang, Naga National movement nung mezümpur aser asen tetsü-tebou nungi liyonga aruba Naga nung tasoli tesem ajungalen nungi tasü tait tetsür aser teburtem aseni ngua süogo, saka tanüa par mangdang aser nükjidong nung asenok nokdaka lir, ta GPRN/ NSCN Ato Kilonser N. Kitovi Zhimomi-i ashi.

Asen lima yutsür aor British nung mesüra nüchiso ngua linük tasen kumtetba India nung dak tashiyim amshia parnok madak yimsü asütsü temeden mali ta Naga pioneers tem dak tangatetba liasü, ta pai ashi.

1947 nungi alima indang map kanga melenshiaka Naga nung dak iba tanüla lir.

Pei tangatetba balala liaka political groups ajunga Government of India den ceasefire nung mesüra iba mesükba jenjang nung lir aser November 17, 2017 nü zülutepba Agreed Position nung ajemdaker ajaki akumtsüboa agizükettsüsa yimten ken o tangatetep kati arutsü asoshi inyakteper.

Naga nung tarutsü putu asoshi political solution ka bener arutsü ya asen nükjidong lir, aser iba tongtipang aser otsüsütsü

inyakyim nung asenok tsüngta pei jurila tsütsü mangatetep aliba nüngdak mali.

Kasa sentong nung "Inclusiveness, National Principles, Traditional Values aser Pragmatic Approach" maliba solution kecha nunga tebilemba aser tangatetba tajung malitsü saka yimtenren tsütsü tebenja ang tali adoktsü, ta NSCN/GPRN tir Akato Chophi-i ashi.

Agreed Position tali tashi itshitsü atema taoba mapang NNPA (Naga National Political Alliance) ta aliba tawa NNPGs den ka kuma lungjema tarutsü nung Agreed Position den külemi amshitsü asoshi 'competency clauses' kar benokogo, ta ashi.

Agreement kar tanü tashi miimshia yimjak nung mesayui aliba ama masü, Agreed Position ya lapoka aliba kaket ka amai lir aser nüburtemi meteta lir, ta pai ashi.

October 31, 2019 tashinung ken o jembir ajungai GoI den yimten ken o jembishinüba takok ngua tembangogo, anungji Naga nung asoshi 'philosophical theories' kangabo mapet, ta pai ashi.

Hebron nung NSCN-IM ato kilonser Th. Muivah-i jembidang, asenok 79 buba Nagalim Independence Day bilemteta aser July 11, 2002 nung Amsterdam Joint Communique aser August 3, 2015 nü Framework Agreement zülutepa alizüng tongtetba benjongdang, iba takok

ya asen taoba Naga nung lenirtemi süngjang tema yutsüba ajanga lir ta angatettsüla, ta ashi.

Item agreement yagi Naga nung ya samaba nisungtem masü ta jangja-jangja ashir. Asen puti otsü lir aser tematiba tashi lir. Tanüa-asünga asenoki asen senti puti otsü aser sovereignty den nokdaktsü. Asenoki India aser Burma (Myanmar) nungi kecha makhanger saka asen meyong kechi ali, aji kibur kuma sangdonger. Iba yongji Nagalim puti otsü, litsü-lika aser sovereignty, Nagalim national flag, Nagalim national constitution (Yehzabo) aser Naga nung aliba tesem ajunga lungjemtsüba onük ya dangar nem agütsütsü makok, ta Th. Muivah-i ashi.

Anungji, India aser Burma (Myanmar)-i Naga nung puti otsü akumtsübora, asenoki ter ben tali parnok akumtsübotsü.

Suruhuto Designated Camp nung 79 buba Naga Independence Day sentong nung jembidang, nüburtemi aginüba aser penzüba ngutettsü asoshi Naga nung ajunga lungjemtsüla, ta NSCN/GPRN kilo kilonser Mhonbemo Tsanglao-i ashi.

Pai Naga national workers tem dang linük tenzüka wadang nung bendanga agütsüshitsü ayongzüka liasü.

NSCN/GPRN tir Niki Sumi indang Independence Day speech-a kasa sentong nung zünga liasü.

DMC Councilor Enoch Wotsa-i Naga nung maksütsüogo: NPCC

Dimapur, Luroi/August 14 (TYO): Dimapur Municipal Council (DMC) nung sorkari shimba Councilor Enoch Wotsa-i maksütsü mapa inyaka August 13, 2025 anepdang sorkar tenüng nung aliba gari ka aser jurila gari ana nung yi aika belendang Khatkati Police (Assam) ajanga apuba osang angashia kanga aoksar aser aitsür, ta Nagaland Pradesh Congress Committee (NPCC) sangdong ka ajanga ashi.

Ibai ozüng nung aibelenba kisüng masü saka yimjak nung nüburtem ashioktsüba lir. Enoch Wotsa, shiba Dimapur nung Nationalist Democratic Progressive Party (NDPP) Youth Wing indang Vice President inyaker, pai state

meyong oset mashi lenmang nung amshia aser yimjak nung ozüng alema inyakba ajanga Nagaland nung aliba nüburtem nem yanglushitsü makokba maktsü ulura bener arutsüogo, ta NPCC sangdong ajanga ashi.

Bushisüngdangba maparen metembang tashi Dimapur Municipal Council nungi tekeraba nung Enoch Wotsa anenja atatsü aser tapet ozüng kübok pa aser pa den alirtem anema mapa tamajung inyakba ken o benoktsü onoki akhanger.

Ozüng alema mapa inyakba nung sorkar meyong gari amshiba tematiba jenjang nung bushisüngdanga aibelena aliba ketdangsür nem tapet temerenshi

agütsütsü akhanger, ta ashi.

Iba ama yimjak nung tzüzüng-ozüng mezügmeshiba nisung ka shimba atema ruling NDPP sorkari Nagaland nung aliba nübur nem telangzüba agütsütsüla. Iba tatalokba ya ajanga tang kumteta aliba sorkar kübok ozüng nung aibelener memerenshi yutsüba sayur, kong tesendaktep tajung alirtem tejangraba nung tashi amshir.

Nagaland nung aliba nüburtem den külemi ochi obendang onoki akhanger. Nüburtemi tamang katettsüsa sorkari tekeraba nung mera agitsüla aser nisung shinga ozüng dang temaba mali ta sayutsüla, ta NPCC sangdong ajangasa ashi.

I-Day nung Nagaland nungi ana nem Police Medals agütsütsü

Kohima, Luroi/August 14 (TYO): India nung Independence Day nung Police, Fire, Home Guard, Civil Defence aser

Correctional Services nungi personnel 1090 nem Gallantry aser Service Medals agütsütsü.

Nagaland nungi taoba Commissioner of Police,

Dimapur, Kevithuto Sophie aser Commandant Aboli Metha na nem Medals for Meritorious Service agütsütsü.

Dimapur & Chümo nung special inclusionary drive agi



Dimapur aser Chümoukedima nung second hand gari ayokertem atema Special GST Registration Drive ka ayongzüka agiba mapang tangokba noksa nung angur.

Dimapur, Luroi/August 14 (TYO): Department of State Tax-i ayongzüka August 12 aser 13 nü Dimapur aser Chümoukedima nung Special Inclusionary Drive ka agiogo.

Züngoksema maliba second-hand gari ayokertem Goods and Services Tax (GST) küboki aitdaksütsü atema iba sentong ya ayongzüka agiogo. Temsüa aliba shishilembaba ajak züngoksemdaksütsü nükjidong nung iba sentong ya ayongzüka agiogo.

Iba sentong ya ACST (Mobile Squad), Zulutemsu-i anir agi aser CSTO team kati teyari agüja liasü. Sentong nung

Commissioner of State Tax, Abhinav Shivam, IAS aser DCST (Mobile Squad), Toshi Yimchunger natia shilem agia liasü. Mobile Squad team-i second-hand gari ayoker tasentem ajak semdanga oa kiburtem den indang indanga sensaksema liasü.

Commissioner Abhinav Shivam-i ashiba agi, gari ayokertem aika GST atema züngoksema maliba ya asa masü saka memetetba ajanga lir. Paisa, parnok merenshitsü atema masü saka inyakyim sülen anidaksü atema tangazükba agütsütsü asoshi iba sentong ayongzüka agi, ta ashi.

ACST Zulutemsu-i ashiba agi, gari ayokertemi telangzüba tajung agütsüba ajanga parnok kanga ajungmesogo, aser sentong nung shilem agirtem, talisa on-the-spot awareness session nung shilem agirtemi GST nung züngoksemsü mulunga aliba lemsatepa liasü.

Sentong nung gari ayokertem dang registration inyakyim indang sayu aser tarutsü nung reprangshitsü atema reckoner device agüja liasü. Commissioner-i ashiba agi, iba sentong ya Department-i saru shitak sarutsü atema asendenshir jenjang agiba nung shilem ka lir.

PHED Rural Division-i Waste Management Technique sayu

Dimapur, Luroi/August 14 (TYO): PHED Rural Division, Dimapur-i, August 13 nü Dhansiripar, Chumoukedima nung Segregation, Composting aser Toilet Maintenance dak sendakba nung Waste Management Technique tem sayuogo. Iba sentong ya Har Ghar Tiranga, Har Ghar Swachhata - Swachhata Dialogue & Awareness sentong nung shilem ka liasü.

Iba sentong nung SDO (Civil) Dhansiripar Sub Division, Vijoyo Swuro, NCS alakteta jaoker liasü.

Sentong nung o jembiba mapang pai, hygiene aser lokti anema aliba na sendaktepa aliba indang lemsatep. Paisa, teyari agütsüba ya kidang nungi tenzüker aser yamaji meremejua kidang nungi tenzüker ta ashi. Pai, kibongshia dang pei ki aser temeket nungi meremejuji tenzüksü ayongzüka liasü.

Kasa mapang nung EE PHED Rural, Er. Nirie-e Nisa-i, Dhansiripar yimtsüing ya temerek model village ka kümdaksütsü la nükla aliba lemsatep, aser

yimdaklirtem dang Dhansiripar yimtsüing temerekba kümdaksütsü atema jenjang agütsü ajungshia liasü.

Sentong nungsa JE Dhansiripar, Er. Hotolu Sema-i anir waste management techniques (Segregation, Composting & Toilet Maintenance) dak sendakba nung tangazükba agütsü.

Maneni Swachhata indang osang agütsütsü atema campaign indang selfie booth dena amenoka liasü.

Tsarü yimdak 'Tsang-Rii Mübü' benjong... (TAPAK 1 NUNGI...)



Ki ka nung tsürabur aser tanurtem külemi septeper aliba jagi aiben tajung agi tamajung küma rarabangsen/nemnemshinem adoker, saka kodang chinurtemi tsürabur ki toktsür pei mesüing lidir, idangjiang tsürabur/chinurtemia chichiba khuret aser temeimji taliba angateta akümer, ta paisa tatishitsü ka bener arua lemsatep. "Asenok ya tepilar masü, anungji, nenok temulung tajem, nenoki tsürabur tamatok aser onokia nenok kodanga mesentoktsü saka taliba dang meimtsü", ta paisa metetdaksü.

Longsa den dang masü saka ano kishikina yimtema lir, anungji, tanü Longsa o Tsarü na koda putepa meimtepa alir, yamaji parnok denja kasa temeimtep nung alitsü asoshi paisa ayongzü.

Pa Tsarü yimdaki aruba tamaitü lanurtem shisatsü balala

angazükdak youth panchayat learning center ka yanglutsütsü aser tetsürtem ak metsütsü asoshi lakh 50 alangba mapatong ka agütsütsü aser iba ajanga Tuensang aser Mokokchung district nung akshi agi manüngtsüsa yangi nungi züsenteta yoktsü imlar, ta pai ashi. Paisa ano Tsarü yim telungtet nung sentaktepa aliba lenmang ajak yanglutsütsü, ta nangzü.

Meyilong yim nungi Chare town tashi lenmang yanglushitsü asoshi asamayang ka tang teinyakdak lir ta angazüker, iba lenmangji kodang asangsang kümdir, Tsarü aser temeket alibatem lenmang aisü nung tajangzü angutsü imlar, ta paisa metetdaksü.

Iba sentong nung tetushi tejaoker MLA & Advisor, Information & Technology,

Economics & statistics evaluation, Sethrongkyü Sangtam; Tsarü Village Council Chairman, I. Mendang Sangtam; Changse Head Barrick; L. Nungshi Head GB; Chare EAC Zerutso Kesiezie parnokia shilem balala agia jemb. Telok balalai sobaliba kentenmenü balala ia benjongmungertem kanga longsotep.

Iba benjong nung Tuensang aser Mokokchung district ana nungi tulurtem den yimtsüing balala nungi yimsüsür, mulungtet telok balala nungi meyongertem densema liasü. Tsarü yim ya Mokokchung nungi kilometer 30 shi pilar lir. Tsang-Rii Mübü ya tsünüsembong yokba ajak adoker alu marodang itemji moajang ta amungba benjong ka lir, ta angazüker.

2nd World War Museum khen atema shibanger

Dimapur, Luroi/August 14 (TYO): Directorate of Art & Culture-i sangdong ka ajanga Kisama nung 2nd World War Museum ya August 20 nungi osang tejangja ka magütsü

tashi shibanga atatsü ta metetdaksüogo.

Museum ya tang teyanglushidak lir aser iba yongji shibanga atatsüsa akümer, ta kasa sangdong ajangasa metetdaksü.

NCSU-i metetdaksür

Dimapur, Luroi/August 14 (TYO): Nagaland

Contractors' and Suppliers' Union (NCSU)-i sangdong ka ajanga, NCSU Golden Jubilee Sub-Committee züngsemtem aser district 16 prongla nungi Unit tir tem dang August 26 nü nikongtsütsü 4 ako nungi tenzüka Hotel Japfü nung

consultative senden ka amentsü ta metetdaksüogo.

Anungji züngsem ajak dang iba senden nung adentsü atema temulungdang yur tamakok maludaksüi adentsü NCSU tir Pele Khezhe aser tezülur N. Tali Sangtam nati külem sangdong ka ajanga mepeshia metetdaksüogo.

ASF azüoktsü atema Kigwema & Mitelephe nung jenjang agiogo



Dimapur, Luroi/August 14 (TYO): VAS Jakhama, Dr. Menguzenuo Chielie den

Veterinary Dispensary aser VHC Kigwema nungi paravets temi August 14 nü Kigwema aser Mitelephe yimtsüing nung African swine flu agi kongshir aliba farm tem mozü agi merektetsüba den iba tashidak azüoktsü atema jenjang balala agiogo.

Yimtsüing nung lenirtem aser ak metsürtem den senaksema mapang Dr. Chielie-i, ASF guideline koda tongtimbang iba indang

metetdaksüba den yimtsüing anaprongla ya Kohima Deputy Commissioner-i infected zone ta sangdongogo, ta ashi. Laisa, nüburtemi teka amteper inyaksü aser tashidak prokshia aoba nokdaksü atema takaratiba nung osang agütsütsü koda tongtimbang iba indang lemsatepa liasü.

Temetetsü kaji ASF dak sendakba nung block-level sensitisation aser awareness training sentong ka July 15 nü agiogo, kong Jakhama block kübok yimtsüing ajak nungi lenirtemi shilem agia liasü.

Dimapur District Citizens' Forum inti senden menogo

Dimapur, Luroi/August 14 (TYO): Dimapur District Citizens' Forum inti senden August 9 nü Hotel Saramati, Dimapur nung menogo. Senden ya Garo Baptist Church, Midland Pastor, Mophish Sangma-i sarasadema tenzü.

Sentong nung Vice President Temsupok Jamir-i lokti pela agizükba o jemb aser Constitution Amendment Committee convenor-i osang agüja liasü. Sentong nungsa mapa toktsüba ketdangpurtem nem tetushi agüja liasü. Nomination Committee

convenor-i report agütsüba sülen taruba tenure atema ketdangpurtem nem mapa nonglojka liasü.

Kasa mapang nung mapa toktsüba Secy(Admin) Bikash Brahma-i tepela o jemb aser Pastor, Kuki Baptist Church, Lalboi Singsit-i temaotsü meshiba den tenüngsang agüja sarasadema liasü.

Ketdangpur tasentem rongnung; Vikato Achumi, tir, Ricahrd Haolai tatong tir, Mar Lemtur tongti zülur aser Ankur Biswas Sharma senotsü zülur nunger densema lir.

New Delhi Nagaland House nung refresher training ka agi

Dimapur, Luroi/August 14 (TYO): Resident Commissioner Office Nagaland House (NH), New Delhi indang officer aser staff tem shisatsü tali renlok daksütsü aser parnok mapa tali tajungba inyakdaksütsü atema August 7 nungi 13 tashi Nagaland House, Dr. APJ Abdul Kalam Road, New Delhi nung refresher training sentong ka agiogo. Training ya shilem ana küma lemsar agia liasü.

Training nung Retired Senior Accounts Officer, Treasuries & Accounts, Khinyi Woch aser

Deputy Secretary, Economics & Statistics, Rhonthungo Andreas Lotha na shisalen sayur liasü.

Training tembangba sülen Joint Resident Commissioner, Nagaland House, New Delhi, Sharon Longchari-i training nung shilem agirtem nem kuli kakat agüja liasü.

Ajak senteper officer aser staff 15 nem, service & leave rules, office inyakyim, pension dak sendakba ken o, itasen aser allowance, fixation of pay, noting & drafting aser tanga office dak sendakba ken o tem nung tangazükba agüja liasü.

SC-i EC dang Voter List nungi agienba tenüŋ lakh 65 sangdongtsü tuyu

New Delhi, Luroi/August 14 lakh 65 sangdongtsü tuyuogo. Bihar nung assembly election Opposition party aikati Bihar sangdongtsü tetuyuba agütsü.
(Agencies): Brihostibarnü Voters List nungi agienba agitsü lia EC-i Special Intensive nung SIR agiba anema court Ken o benokertemi court
Supreme Court-i Election tenüŋtemji melamela Revision (SIR) exercise agiba nem temepishiba ken o agüja dang, India senso ka latettsü
Commission of India (ECI) dang bushitettsüsa district-sasep sülen August 1 nü draft lir. Judge anati akümba bench- mesüra inyakyim makai voters
August 19 nikonkdang 5:00 ako nung sangdongang, ta Supreme electoral roll sangdongogo aser i item ken o angadangba agientsü atema Election
tashi nung Bihar nung draft Court-i metetdaksü. final list ji September 1 nü mapang nung draft voter list Commission dak tashi mali, ta
voters list nungi agienba tenüŋ Taküm November ita nung sangdongtsü. nungi agienba tenüŋtemji metetdakja liasü.



सत्यमेव जयते
Government of India

79buba INDEPENDENCE DAY

anogomong nung linük senso ajak den tepela salem lemsateper



“

Bharat-i mera tuluka agitsü renema lir, ta tanü alimai bilemer süra, ibaji küm 11 indang tashitait tamendakdak agi lir.

- Narendra Modi

”

Red Fort nung agiba Independence Day anogomong sentongji anepdang 6:30 ako nungi Doordarshan network nung 'live' sayutsü.

CBC 22201/13/0013/2526



TIR YIMYIM YIMOBILEM (EDITORIAL)

DIMAPUR FRIDAY, AUGUST (LUROI) 15, 2025

Ano nüjiso mangu !

British yimli talenba nungi India salar taküm agi yimten nüchiso anguba anogo 79 buba amonger. Atangji, India ya shinga linük temzüng kübok mali, anungji laa alima kintem rongnung yimten nüjiso anguba kin ka ta züngshitsü akok. Ajisüaka, kodang India telong nung nübortem taküm tia reprangdangdir, kasa India senso saka kar temaba kin aser kar teküpbok jenjang nung aliba kin, anungji temaba kin o teküpbok jenjang nung alir kin na ki ka nung külemi alitsü makok aser parnok o parnok na kongshiteptsüa makok, kechiyong teküpbok jenjang nung alir kintemji janaona aoker tesempatsü kin aser temaba jenjang nung alir kintemji temerük, anak memezüi aliba kin. Iba amaji kasa India nungersa süaka chipo aonpu aser auso marok kasa amshia külemi soruchioka chiyongtsü makok, aji parnok sobaliba aser idakji parnoki amanger. Ibaji dang masü saka kasa India nungersa süaka tamangba yimsü nunga pei amangnütsü sademsadema mamangtetba llimaji India ya ka lir. Aji oda, India ya Hindu lima ta Hindu nunger aikati züngshir, anungji parnok tangatetba nungbo India nung tamangba yimsüji Hindu dang asütsüla ta asüba nung nokdaka lir. Item jagi, India nung tanga yimsü, talisa, Muslim aser Khristanem anema inyaker. Aji oda, joko state aika nung nashi shi meyokdaksür aser tamangba yimsü melentsü memelar. Ibayongji, India-bo yimten nüjiso ngur küm 79 ajunger saka India nung, ano taliisa, Khristan-tem aika tetsübu tia nung lir. Tanü India nung item tetsübu tia nung aliba purtem asoshi , Rabindranath Tagore-i ashi ama, tetsübu maliba nüjiso ka nüngdaker. Linük temzüng nung temzüng yanglurtemibo shisa talang aser tangatetba tajung agi, India ya pei temzüng kübok aliba aser nübortemi yimsü asüba yimten yimli ka asütsü aser tamangba yimsü ka dak dang amangba linük masü saka senso shia nem pei amangnüba tamangba yimsü amangtsü aser sayutsü temeten agütsüba linük ka asütsü ta temzüng ajemdakdak okila nung jangjajangjaa shia lir. Aji oda, India nungbo senso shia nem pei amangnüba tsüngrem dak amangtsüba temeten dang masü saka kecha tsüngrem daka mamangnür asoshia mamangtsü temeten dena agüja lir. Atangji, koba tamangba yimsü südirsüaka, tamangba yimsüi peisasa pei azüoka alitsü aser tangar asoshi tajung inyaksü dang sayur, anungji tangar ka nem aseni amangba tamangba yimsü ka kangshia amangdaksütsübaji nüngdak madoker aser peii shitaka ta mangatetra amangtsübajia kecha tajangzük mali. Aji oda, linük temzüng nung aliba ama yimten yimsüsürtemi anir senso ajaki shitak benschia otet nungbo, India lima ya alima nung tesüngjem, teputep, tepela aser yimjung aliba lima ka asütsüba ser nung , yimten yimsüsürtemi anir peii amangba tamangba yimsü dak alaka tanga tamangba yimsü mamangdaksütsü asoshi tashiyim agi inyakba ajanga tesem tesem nung aiben rongrong adokba angashir. Asenokiang junga mamangteter aser meinyakteter dang ashi, India nung nübortem asoshi temeim mapa tajungtiba inyakba tamanger telokjibo Khristan-tem dang lir. Ajisüaka, India nung Khristan school nung zünga tashitemetet angurtemiang Khristan yimsü anemer aser Khristan-temi lapokba mozü kidang taneptsü angurtemiang Khristan-tem maginer. Aji oda, Khristan-temi India nunger nübortem dang nisung ajak Tsüngremi yanglu, ajak Tsüngrem chirtem, anungji ajak kasasa, kar temaba aser kar teküpbokba ta mali ta osang tajung sayutsüngia jajar aser temaba jenjang nung alirtemi amokseper alir teküpbok jenjang nung alirtem nem iba nüjiso aser tangatetba agütsür. Aji oda, India nüjiso anguba ajanga India nung India nunger ajak kasa nisung aser kasa senso kümer kasa jenjang nung melitet tashi India nunger nüjiso mangu den kasa asütsü. Nüjiso ya asenbo sademsadema jangratema alitsü saka tangarbo aseni alener ayutsü ta asüba tensa mapang dang ajar masü saka nüjiso jagi senso shia nem kasasa temeten aser tepela agütsütettsüla. Kidangbo achiajemtsü kecha makatsüa akok saka yangji tetsübu mali sadoksadoka litetra, ajiang shitakba nüjiso asütsü.

OLEMSABANG

Khristan kibong kaji tesendaktep tajung akaba kibong asütsüla

~ L. Kika Pongener

(Yashi adok nungi...)

Kiyonger-kidanger den tesendaktep : Khristan kibong kaji kiyonger-kidanger den tesendaktep tajung alitsübaji kanga dang tongtipang lir. Yisu-i ozüing meteter Farise ka dang ashi.... "Nai ne kiyonger pei ama meimang" (Luke-10:27). Ano Tsüngrem o-i yamai ashir, "Talang nung aliba adianu ka dang nungi ana nung aliba kiyonger ka tajungba" (A.Shin-27:10). Tanü Khristan kibong aika bendanga agütsüba tamanger tajung, tekülemi sentepi teti meranga aor, tenla-tenjia meranga abener, loktiliba ajak nung shilem tajung agir, arogo nunga tenzüker tajung, saka kiyonger-kidanger denbo shinga dena putepa melitetba Khristan kibong karbo lir. Aji oda, Khristan tajung kati kiyonger-kidanger ajak den küsa liromedema jungtepa yimjung nung alitsüla. Aji oda, tangar den liromedema melitetba kibong ka dang Khristan kibong...ta koda ajatsü....??? Kibong nung lendong timtem, toudhi, tasü-tama atalokdang, kinunger-adianu, kimang-sosem tajung aika liaka, parnokji arua matongdang tamasa kishi lapoka asen kidangi ayaketa atua yariteperji asen kiyonger-kidangerji asütsü. Anungji tensa mapang ajak nung kiyonger-kidanger den putepa aser jungtepa alitsü kanga tongtipang ta angatetdi. Kibong ka indang tajung suaka, tamajung suaka tangar dang kuli sutsürji kiyonger-kidangerji asütsü.

Yimden aser loktiliba den tesendaktep : Asen mimchir ya kija aliba shilo ka masü, anungji alima mesama tashi loktiliba den sendaktepa alitsü. Anungji alima nung ali tashibo yimden, arogo aser loktiliba den sendaktepa, saru-molok toka, nupotsük ajak nung tashi angaa adentsüla aser temzüng-ozüing küpok tashi angaa alitsüla. Kechiyong yimden bangdakji senso shia aser kibong ajak atema akümdong lir. Aji oda, yimden bangdak tazüokba küpok melitetra Khristan taküm aser Khristan kibong ka ta meshitettsü. Yisu alima nung alidang, Yihuda limaji Roman yimli yimsusuba küpok aliba tensa mapang ka liasü. Anungji Yisu-ia Rom chuba Kaisar nem alimelen agütsütsü tim...ta ashiba angur..."Kechi Kaisar meyong aji Kaisar nem agüjang; aser kechi Tsüngrem meyong aji Tsüngrem nem agüjang" (Mathi-22:21). Kechiyong yimden-ji Tsüngremi alima nung mimchir sobalibaa alitsü aser bangdak ka küpok azüoka liromedema alitsü agütsüba lokti ka lir. "Aser kechi bangdak lir; aji Tsüngremi shimtetba. Anungji shibai iba bangdak anema nokdakdir, pai Tsüngremi shimtetba anema nokdaker. Aser shiri iba bangdak anema nokdaker, parnoki pei sasa obendanga angutsü" (Rom-13:1-2). Anungji yimden küpok tashi angaa alitsübaji Khristan kibong aser taküm ka atema tim teinyaksü mapa...ta laishiba jagi sayur. Kechiyong yimden bangdakji alima nung Tsüngremi lateta yutsüba tongtipang lokti-tentet rongnung ka lir.

Sobaliba den tesendaktep : Alima nung alir kin ajunga pei pei sobaliba (Culture/Tradition) tamendaktak ka-ka lir. Asen Ao kin-a otsüla-oboula nunger nungi benschia aruba sobaliba tajung mera-taket aika lir. Sobaliba dak aketba tongtipang kar...Oshi-oben, subosulemtsü, chiyunga-ajemba, kenten-menu, yar-tsüngsang, benjong-bentsü, libaliru, itemji lir. Terasatsüka, otsüla-oboula nungeri mezüing Khristan yimsu agizükdang, tera aibelen angatetbaji, asen sobaliba tajungtem aika temenen amai bilema endok. Aji oda, asen sobaliba tajungtem aika endoker, anuolen alir temesunger sobaliba-ang tajung amai aji ajizüka benschir. Ano pei kin oshi mejembi-i sendoka yutsür, temesunger oshi English oshi-jiang tajungba ama sapua jembir. Anungji asenoki kanga junga angatettsübaji, Coat, suit, neck-tie etc. item ya Khristan yimsu indang subotsü masü, saka par anuolen alir (Westerner) sobaliba subotsü lir. Ano English oshi ya-a Khristan yimsu indang oshi masü, anuolen alir par sobaliba oshi lir. Aji oda, asen tetsü oshi 'Ao oshi' yabo limabur temenen oshi amai mangatettsüla. Otsüla-oboula nunger suboba asen sobaliba subosulemtsü ya limabur temenen subotsü amai mangatettsüla. Aji oda, tanü tashitemetet putu nung coat/suit neck-tie agibaji kanga junger, iba nungji aibelen kecha mali, saka asen sobaliba subotsü mera-taket tajungtemjia suboba nung aibelen kecha mali. Ano English oshi jembiba nung aibelen kecha mali, takoker-ibo English oshi dang masü, alima nung akaba oshi ajak angazüka jembitsüla, saka asen tetsü oshi yabo tanür-tain ajungai jembitsüla aser wazüka ayutsüla. Akok asübo asen sobaliba ayak mesamai wazüka ayutsü atema, ita nung deobar ka shimteta, tekülem sentepi arur ajungai pei kin sobaliba subotsü meraketa subor arutsü...ABAM-i mesura lim arogo-i bangzüng ka amai lateta ayunungbo kanga ajungtsü...ta shisadanger. Aser iba tekülem sentep nungjibo asen tetsü oshi temeja agi sentongji aginung kanga ajungtsü. Taküm küm nungi ABAM-i asen Ao oshi wazüka ayutsü atema lim arogo ajak nung asen oshi anogomong sentong tajung yangluba-to kangasa shisa-taka sentong tajung ka atongogo ta Aotsür Aor senso tajung aikati kanga pela-a agizükogo aser mungdang (ABAM) lennirtem nem tenungsang agütsür.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Jan 1 nungi Aug 10 tsüngda Nigeria nung Khristan 7087 tepsetogo

August 14, 2025: Taküm küm tenzüker August 10, 2025 anogo tashi nung Nigeria nung Islamic kiralongrartem aser Fulani teloktemi Khristan 7,000 dak tali tepsetogo, ta civil society organization kati metetdaksü.

Taküm January 1 nungi tenzüka August 10 tashi nung (anogo 220) Nigeria nung Khristan 7,087 tepsetogo, ta Anambra nung amenoka aliba International Society for Civil Liberties and Rule of Law (Intersociety)-i metetdaksü.

"January 1 nungi August 10 tashi nung Khristan 7,800 puer ao," ta Intersociety-i metetdaksü.

Nigeria nungertem nungi bendenba osang, foreign media osang, sorkar osang aser Khristan melungtet telok balala osang bendena Intersociety-i iba report renema liasü.

"Khristan 7,087 shi tepsetba aser 7,800 puer aobaji anogo shia Khristan 30 shi tepsetba aser aser ghonda ka shia Khristan kaka tepsetba den kasa lir," ta Intersociety-i metetdaksü.

"Anogo shia Khristan 35 puer aoer aser ghonda shia Khristan ana amai puer aoer," ta kasa report nung shia lir.

Tesüiba küm 10 tsüngda Nigeria nung Khristan meyirjang aika tepsetogo aser million aika pei kidang nungi jenshiogo.

Nigeria nung talisa Middle Belt nung aliba state tem nung Khristantem jenti tepsetba ya

yimsü nung ajemdaker inyakba lir, ta melungtet telok aikati ashir, ajisüaka Nigeria sorkaribo iba ya yimsü nung ajemdaker masü saka akhidang nungi aluyimer Khristantem aser kisetshiruru metsür Fulani Muslim nungertem tsüngda raraa arur, ta ashir.

Intersociety-isa, Nigeria nung Islamic kiralongrar telok 22 shi jenokdaksür, aser item telok teimbaka Islamic State aser World Jihad Fund den sendaktepa lir, ta metetdaksü.

Intersociety-isa, Islamic kiralongrartemi Khristantem aser akhi yimsü amangertem meshimeshia samatsütsü meranger, ta metetdaksü.

Intersociety Chair, Umeagbalasi-i, 2010 küm nungi tenzüka pai aniba teloki Nigeria nung Khristantem reshikangshiba aser tamangba yimsü temeden anema inyakba tatalokbatem mita arudar, ta metetdaksü.

"Onoki Nigeria linük nung item tensa asadanga arudar, aser tensa tamajungba dang akümer," ta Umeagbalasi-i metetdaksü.

Nigeria nung Islamic kiralongrar telok 22-i Nigeria nung lisopur teloktem aser parnok maitsü samatsütsü meranger, talisa küm 3,475 tain Igbo sobaliba samatsütsü meranger.

Intersociety-isa, 2009 küm nungi tenzüka Nigeria nung nisung 185,009 tepsetogo, aser iba nungji Khristan 125,009 aser Liberal Muslim nunger

60,000 densema lir, ta metetdaksü.

2009 küm nungi tenzüka tang tashi nung Nigeria nung Tenla ki 19,100 rongdoktsüogo, Khristan lenir 600 puer ogo; Khristan lenirtem rongnungji putir 250 aser pastor 350 densema lir, ta kasa report ajanga metetdaksü.

Umeagbalasi-isa, Nigeria sorkari aibelenertem teimbaka mapur, ta ashi.

United States aser anüolen aliba linüktemi Nigeria nung iba tebilemtsü anema inyaktettsü, ta shia Umeagbalasi-i, U.S. Tir Donald Trump kübok State Department-i Nigeria ya "Countries of Particular Concern" list nung züngoktsüla, ta metetdaksü.

Trump mezüng kümsük Tir inyakba mapang nung Nigeria ya CPC list nung densema liasü, ajisüaka Joe Biden administration mapang nung Nigeria ya CPC list nungi agien.

U.S. Commission on International Religious Freedom (USCIRF)-i maneni Nigeria ya CPC list nung züngoktsü akhanger.

Umeagbalasi-isa US, Europe aser Canada nung lenirtem dang first-class Fulani Muslim nungertem, Islamic cleric tem aser Nigeria nunger lenirtem linüki marudaktsütsüla, ta mepishia metetdaksü.

Alima nung Khristantem alitsü atema linük tamajungtiba 50 rongnung Nigeria ya jenjang 7buba nung lir (Open Doors 2025 World Watch List).

ANOGO ABEN TSÜNGREM DEN

Parnok Yisu den liasü

Tang parnoki kodang Peter aser Yohan tasü aitba angu, aser kodang parnok kaket mashiba aser memetetba ta ajitet, parnoki süngmang. Aser Parnokji Yisu den liasü ta parnoki meteta aküm (T. Mapa 4:13).

Kodang Yisu Khrista dak teka ai idangji nütsüngtemi pa kija toktsür jena ao, Peteria asemben tashi Yisu menangzük. Saka kodang Tanela Temeshi arua pamok dak atern parnok melenshi, tasü mait nütsüngtem tasü ita aküm, tasütsü metsübui Yisu indang kuli asü. Kodang pamoki kuli asüba aser Pa asoshi inyakba angu, parnok pa den liasü ta ajitet. Parnoki Pa den mapang indoka angazük, Pa den jaja aser Pa jakla parnok dak angu, anungji parnok Pa den liasü ta metet.

Kodang asen taküm nung Khrista agizükdir, Pa jakla asen dak adokdir, Pa den mapang indoka angazükdir, idangji asenok Pa nütsüng ta alimai metettsü. Iba kuli ajanga Tsüngrem sentsüwangshitsü aser Pa tesangwaji tali jungkai adoka yadaktsütsü. Kodang Pa den maneni jajadir, Pa den temaba tajungba jenjangi atutsü, idangji temenen nungi tali pilatsü aser Pa mesük tali akümstsü. Ne takürn nung Pa tesangwa yadaktsüdar ma ? Na Pa den lir ma?

ABAM Church & Mission-i ayongzüka Counselling training agi



Impur, Luroi/August 14 (TYO): ABAM Church & Mission ajanga ayonga maneni Counselling Training August 11-13, 2025 anogotem nung Impur nung agiogo.

Tanü nüburtem shisabulu khuret balala ajanga timtemba aikati ajurua arudar. Item tebilemtsü anepalutsü asoshi tim tesayuba angazüktsü nüngdak asünung iba sentong ya agia arur, ta ABAM Executive Secretary, Rev. Temsü Jamir-i sangdong ka nung metetdaksü.

Iba ya tongtibang ta angateta taküma Arogo nung tenzükertem asoshi tim anepaluyim angazüka nüburtem tenzüksü asoshi iba sentong agiogo. Ajak agi Arogo 12 nungi parnok 26 arua iba sentong nung aden.

Bendanga agütsüba sarasadem agiba mapang Rev. Temsü Jamir, Executive Secretary, ABAM, ajanga, joko tim anepaluyim tesayuba angazüker aor asünung, nüburtem khuret balala asoshi taneptsü O bener tasü itta aser mulung lemteta Tsüngremer tashi nung aika nem tajangzükbba aser taneptsü agüja inyakang, ta ajungshi.

Iba sentong nung Shisalen sayur, Rev Dr. N. Moa Imsong, Counsellor, DABA liasü. Tsüngremi nübortem taneptsü asoshi parnok amshiangma ta sarasademer.

Maharashtra nung Khristantem anema inyakba kanga bulua ataloker



August 14, 2025: Maharashtra state nung yimsüsürtemi tamangba yimsü meyipba nokdangtsü atema anti conversion ozüng ka benoktsü atema jembiba mapang iba state nung Khristantem anema inyakba kanga bulua kümдар, ta International Christian Concern (ICC)-i metetdaksü.

Maharashtra nung kanga tezülen aliba yimtsüng ka nunga Khristan kibong 14 anema inyakba sülen parnok aika anasa aliba jilatem nung jenokogo.

Tawa BJP MLA kati Hindu nungertem Khristan yimsü dangi meyipdaksütsü meranger putirtem/pastor tem tepsetra pai senpet agütsütsü, ta sangdonga liasü. Ano külen

kasa anogo nungjisa chief minister-i scheduled castes nisungtem shirnoki Khristan yimsü dangi meyipdir sorkar schemes balala nungi teyari magütsütsü, ta metetdaksü.

Pastor temi ashiba agi, police aser yimtsüngtem nung lenirtemi August 15 nü Khristantem jaoka parnok Khristan yimsü dangi meyipba dak sendakba asüngdangyatsü.

Khristan karibo iba mapang nungji loktii Khristantem dak azüktsüa akok ta tsübur.

July 17 nüa yimtsüng ka nung Hindu nationalist züngsemtemi Khristan 56 amak. Parnoki Khristantemji kidang nungi anizüker azük. Karbo teret sükdang aser temang shilem balala yirua

liasü. Khristantem aikati pei ki toktsür ajenba sülen parnok ki aser alu raksatsüba den kisetshiruru tepsetogo.

Takoksa anguba Khristantemji pastor kati anogo 10 jenokdakja liasü. Police-i Khristantemji yim tashi anir otsüogo, ajisüaka yim semdangtsü atema pastor nem temelaba magütsür.

Pastor-i, "Parnok pei akaba ajak samaago aser parnok tarutsü tiaji jangramatem. Onoki temepishiba aiben agütsüogo, ajisüaka tang tashi aibelenertem mapur," ta metetdaksü.

Ano July 19 nüa yimtsüng ka nung Bajrang Dal züngsemtemi Khristan kibong ka sarasadem tagidak mapang nung amak.

Khristan lenir kati, "Item ama tatalokba kanga bulua atalokba ya asalentong yanglur inyakba lir. Maharashtra nung anti conversion ozüng agizüktsü nükjidong nung Khristantem anema inyaker," ta metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG



Teshimak

(v) onsara tali mejang, kecha memeteti mejang (excessive sleepiness)

* Teshimak purtemi mapa nung tangar memeneper.

Teshimzük

(n) meshimbatem, tajung tajung agir anüngba (rejected one)

* Dokan nung aonsutsü teshimzük jenjang dalang agi ali.

OLONG PAITEP # 7240

	1		2			3		4		5
6								7		
					8		9			
			10							
11										
				12						
13		14		15						16
17							18			

TIPILEN

- Inyaker ajangtetba - (3)
- Bangsemo adokdak - (5)
- Shitak mesüi inyak - (7)
- Ya mimong nung angur - (3)
- Reprangzük - (4)
- Tasola - (5)
- S ____ - (4)
- Yagi ajak ashiochtsür - (3)
- Ki aokba oset - (7)
- Ak shi nung inokba tasen - (5)
- Ishika - (3)

LANGTSÜNGLEN

- Meshidak - (3)
- Tanaben soshir - (7)
- Iba anogo - (4)
- Meshi - (3)
- Yagi mi tsükloker - (9)
- Shi tapu ka - (9)
- Yagi ayimer saka ozü masü - (3)
- Ajokba shiruru ka - (7)
- Inyaktet - (4)
- ____ hi - (3)
- Akümlü nungi pilar - (3)

OLONG PAITEP # 7239 TELANGZÜBA

TIPILEN :

- Telok, 4. Aluru, 6. Ozüng,
- Emk, 9. Kin, 10. Teti, 12. Süir,
- Jen, 14. Ola, 16. Talak,
- Mazük.

LANGTSÜNGLEN :

- Tenükjang, 2. Luden, 3. Kioktsü,
- Lenti, 7. Tajangzük, 11. Teronem, 12. Sempa, 13. Jahaz.

NAI-A YA METETTER MA



India Nüjiso ngur küm 77 sülen Mizoram yimtiba Aizwal tang mezüngbuba Indian Railway den sendaktepogo. Iba km 51 talang railway lenmang nung tunnel 48 aser apu 140 dak tema lir.

Arrtsü anasa atsü atsütsü atema Meghalaya sorkari temepishiba agütsü

Shillong, Luroi/August 14 (Agencies): Meghalaya sorkari Union Ministry of Home Affairs (MHA) dang, atsü matsüi aliba ali km 40 kümzüka ayutsü atema international arrtsü anasai oa atsü atsütsü asoshi Bangladesh nungi temelaba meshitsü mepeshia metetdaksüogo, ta Deputy Chief Minister Prestone Tynsong-i ashi.

Paisa, state sorkari MHA dang, arrtsü nung tongshi tongtitem anasabai oa atsü atsütsü asoshi Bangladesh den sensak asemtsü mepeshia asüngdangogo, ajita asünungdang yimtsüngtem kümzüka yutettsü, ta ashi.

International inyakyim kübok atsü ya linük litsü nungi yard 150 telungi ira atsür. "Meghalaya dak sendakba nung iba inyakyim ya

benoka inyakra yimtsüng aika atsü tema nung toktsütsü aser iba ajanga nüburtem lendong nung toktsür," ta Tynsong-i ashi, shibai Home portfolio bona lir.

Rongdangai yimtsüng nung tawa Bangladesh Police constable ka densema porangbong aser hadir balala bener nisung trok India-i aita local dokan amener ka züka merenshiba den sen aser senti ostet auyar aoba sülen arrtsüi anasaba oa atsü atsütsü atema takhangba tali kümogo.

Bangladesh nungertem India-i aita inyaksangshiba atema apuba sülen arrtsü nung tensa asadangtsü atema Tynsong-i Bodhbarnü Home Department ketdangsürtem senden ka ayongzüka mena liasü. Pai ashiba agi, atsü matsü aliba km 40 telongtet nung

alirtem international inyakyim ama dang atsü atsüra parnok lendong nung toktsütsü.

Deputy Chief Minister-isa, Deputy Commissioners aser Superintendents of Police ajak dang, East Jaintia Hills nungi Garo Hills nung Dalu tashi nung linüki ozüng alema aitertem nokdangtsü atema India aser bangladesh arrtsü nung jenjang tapet agitsü tetuyuba agütsüogo, ta metetdaksü.

Kasa mapang nung Border Security Force (BSF), Meghalaya Police, aser Village Defence Parties (VDPs) nungeri Bangladesh-i aoba lenmang ajak kanga junga meita atadar. Taoba mapang tatalokba nung densema alirtem kar danga India nung jenoka lira parnok aputsü atema iba jenjang agidar.

Mizoram MP-i BRO dang project tem tekaratiba nung inyaksü mepeshi

Aizawl, Luroi/August 13 (TYO): Mizoram nungi Lok Sabha member, Richard Vanlalhmangaiha-i Border Roads Organisation (BRO) dang tang benoka inyaka aliba infrastructure project tem takaratiba nung inyaksü, aser state nung ali alizükba ken o bentettsü mepeshia metetdaksüogo, ta official sangdong ka ajanga Bodhbarnü metetdaksü.

BRO Director General Lt. Gen. Raghu Srinivasan den New Delhi nung BRO headquarters nung Mongolbarnü senden amenba mapang Richard-i, lenmangtem aser Mizoram nung tang

benoka inyaka aliba tanga tongtibang infrastructure project tem takaratiba nung yanglutsü nüngdakba lemsatapa liasü.

Pai talisa, concrete aputem takaratiba nung yanglutsü mepeshi, koba joko mapang tatsüka bangdaker lir.

Iba den bendenloksema Mizoram MP yagi, Mizoram kübok Lawngtlai, Siaha, aser Champhai district tem nung ali alizükba ken o bangdaka aliba atema süoki ia bilemba lemsatepogo. Pai, iba ken o bentettsü atema BRO-i jenjang agitsü mepeshia liasü.

Richard-isa, BRO tekolakba dang southern Mizoram nung Tipa-Laki-Lope-Lopu (LTTT)

road project atema temenok sen lakh 82 magütsüi aliba agütsütsü mepeshia metetdaksüogo.

Ken o dak sendakba nung Lt. Gen. Srinivasan-i, Richard dang state nung tang inyaka aliba mapatem takaratiba nung benoka inyaksü atema pai takaratiba nung jenjang agitsü tenangzükba agütsü.

Paisa, district asem nung ali alizükba ken o aser LTTT road project atema temenok magütsüi aliba takaratiba nung bentettsütsü nangzüka liasü.

Srinivasan-i, pai Mizoram semdanga tang inyaka aliba project tem asadangtsü ta MP nem metetdakja liasü.

Manipur nung prangbong aser bomb bener nisung 9 apu

Imphal, Luroi/August 14 (Agencies): Manipur nung security force temi, district balala nungi telungpur tenet densema nisung teku puogo, ta ketdangsürtemi Brehostibarnü metetdaksü.

Manipur Police aser Assam Rifles na senteper meita aoba mapang Kangleipak Communist Party (PWG) zügsem ka apu. Pa ya Imphal East district kübok Nugaipokpi Maning Leikai tesem nung rakzükrakdemba nung densema aliba atema Bodhbarnü apu.

Kasa mapang nung telok ka nungi dang tetsür ana densema telungpur asem Kakching district kübok Wabagai Lamkhai tesem nung Mongolbarnü apu. Parnok asem ya-a rakzükrakdemba nung densema liasü.

Iba den bendenloksema KCP(MFL) züngsem ka Imphal East kübok Pangaltabi Makha nung Bodhbarnü apu aser Kangpokpi district kübok Keithelmanbi Vengpi nungia rakzükrakdemer ana pua liasü.

Itangitertemi teyari agüja state kübok tesem balala nung

ozüng alema inyaksangshirtem aputsü atema meita aoba sentong benoka inyakdar.

Maneni Tengenoupal district nung India-Myanmar arrtsü tongshi number 85 anasa Peoples' Liberation Army züngsem ana puogo.

Security forces temisa Churachandpur district kübok Dampi Ridge tesem meita aoba mapang single-barrel rifles trok, improvised explosive devices (IEDs) pongu, long-range mortar asem ngutetogo, ta police-isa metetdaksü.



Guwahati: 79buba Independence Day atongtsü anogo ka lia security force temi Assam-Arunachal Pradesh arrtsü nung Phinbiru yimtsüng nungi bomb aika ngutetogo.

Trump-Putin senden sülen US-i India dang tariff tali meshitsü akok

Washington, Luroi/August (Agencies): New Delhi-i Russia nungi totzü aliba manenra Donald Trump administration ajanga India dang tariff tashi meshitsü akok, ta US Treasury Secretary ajanga tekumdangtsü shiogo.

Bodhbarnü Bloomberg TV den jembidang, Russian energy aliba China aser danga linüktem dang US den külemi tariffs tali meshitsü US Treasury Secretary Scott Bessent-i European linüktem aser danga linüktem ayongzüka liasü.

Hokulbarnü Alaska nung US Tir Donald Trump aser Russia Tir Vladimir Putin senden amenba nung ajemdaker temerenshi ta taliba akumtsü akok mesüra ajemtsü akok, ta pai ashi.

Hokulbarnü Alaska nung jembishinüba nung telemtetba tajung ka marura Washington-i New Delhi dang tariffs shilem 50 meshia aliba nung ano secondary sanctions meshitsü akok ta ashi.

"Item sanctions nung onok den European nungertem adentsü nüngdaker... Parnok adentsüla... Ibai lapoktsü mesüra shibangtsü mapang lir.

Russia nunger totzü aliba ajanga India nunger dang asenoki secondary tariffs meshir. Aser inyakyim tajungba mekumra, sanctions mesüra secondary tariffs tali meshia angur," ta Bessent-i ashi.

Alaska nung senden amenba mapang Ukraine nung yimjung asoshi telemtetba ka magitetra timtem tulu asütsü, ta Trump-i Putin amokmerenba sülen Bessent-i iba tekumdangtsü o ya ashi.

Tawa Trump-i India nungi bener aruba osettsüset nung temerenshi shilem 25 meshir aser ano Russia nungi totzü aser nok-nü aliba atema tariff shilem 25 tali meshir. Ukraine den raraba nung New Delhi-i indang-indanga mesüaka Moscow yarir ta US administration ajanga aitsür.

Tariff tasenba ya India-i tanen makai Russia nunger totzü aliba dak sendaktepa lir. Trump indang executive order nung India-i Moscow nungi indang-indanga mesüra lenmang balala nungi energy alizükba ajanga Ukraine amakba mechi Western linük temi Russia azüngmeyaka yutsüba nung tetsükdaksü agütsür ta shia lir.

taoba mapanga Trump-i social media nung India aitsü aser Russia nunger totzü nungi tajangzüik bushir saka Ukraine nung nisung asüba mezüingshir ta ashi.

Reciprocal tariffs yabo meshi tenzükogo aser duties tali meshitsüba ya August 27 nungi tenzüksü.

Ajisüaka India-i par energy tasa bhukuma nokdaker aser Russia nungi crude oil aliba ya Moscow indang 'political endorsement' masü saka alima nung market tensa ajanga yamai inyaktsüsa akumer ta ashir.

Linük tejangraba aser economic security wazüka ayutsü asoshi nüngdakba mera ajak agütsü ta New Delhi-isa ashir.

Tariff tali meshiba ya tim masü aser kuli tejangja maka ta Ministry of External Affairs ajanga ashir aser Russia den shishilempaba tesendaktep tsütsü United States aser European Union ya anatsü nok amai lir ta ashir. Nuclear industry asoshi US-i Russia nungi uranium hexafluoride maneni bener aor ta MEA sangdong ajanga ashi.

Russia Tir Putin-i Trump tenüng asanger

Moscow, Luroi/August 14 (Agencies): United States Tir Donald Trump-i Ukraine nung rara tatem kati arudaktsütsü merangba asoshi Russia Tir Vladimir Putin-i tenüngsang agütsü.

Ukraine nung küm asem dak tema rara aliba jembitsü asoshi lenir ana Alaska nung ajuruteptsü renemba mapang Putin-i iba o ya ashi.

February 2022 nung tashi ajak amshia Ukraine amak tenzükba sülen Hokulbarnü senden ya Putin-i anüolen linük kati aoba mezüngbuba alitsü.

Ajisüaka iba jembishinü nungya Brehostibarnü British Ato Kilonser Keir Starmer ajurusang Ukraine Tir Volodymyr Zelenskyy maden.

Iba senden ya nikongdang 19:30 (GMT) ako nung tenzüka Putin aser Trump den o meyiptsü kisüng amentsü aser iba sülen linük anaprong nungi delegations tem tsüngta jembishinü akatsü aser külemi osangbener senden ka akatsü.

"Ni angatetba agi... US administration-i rara tembangtsü asoshi kanga meranga inyaker," ta Putin-i Brehostibarnü Moscow nung ketdangsürtem dang ashi.

Senden amentsü atema Trump aser Putin nati taoba hopta mulungtep, aser US tiri küm asem ser tesadang rara anentsü meranger. Ajaki meteta aliba ama Ukraine onük ya tongtipangba asütsü, saka security aser rongsenketzüng indanga jembitsü, ta Kremlin aide Yuri Ushakov-i ashi.

"Shishilempaba aser rongsenketzüng densema linük

ana tsüngta tarutsü nung amalitep akatsü indanga tangatetba lemsateptsü imlar. Iba tesentaktep ya ulura saka tia maka mokongshi lir," ta Ushakov-i ashi.

Russian delegation nungya Foreign Minister Sergey Lavrov, Defence Minister Andrei Belousov, Finance Minister Anton Siluanov, aser Putin indang special envoy for investment and economic cooperation Kirill Dmitriev alitsü.

Alaska nung senden amentsü lia Ukraine-i Russia dak drones ter dak tema khalokja nisung kar yiru aser south tsütsü Volgograd yimti nung totzü atsüba tesem ka nung mi adok.

Kasa mapang Russia sepaitemi Ukraine anüdoklen nisung aliba tesem ana agiogo, kong parnok ita aika rara arua liasü. Zelenskyy, shibai yimjung tezüngzüktep nung shilem ka ama Russia nem par litsü agütsütsü memulunger, pai Brehostibarnep British Ato Kilonser Starmer ajurua liasü.

Starmer-i pa aliba Downing Street nung Ukraine lenir dak azüita aser teka agi salema agizük. Tena sensaksemba sülen Starmer-i X nung "Britain teti Ukraine den nokdaksü," ta zülua liasü.

Zelenskyy-ia X nung Starmer den senden tajung ka menogo aser Russia-i nisung tepsetba anendaktsüba nung United States-i takok ngura, teti asoshi yimjung alitsü asoshi security guarantees indang tejangja sensaksemogo, ta ashi.

Paisa Ukrainian drone

production nung senotsü indoktsüba indanga jembi ta ashi.

Trump aser European lenirtem phone ajanga jembir anogo ka lir tena ya ajurutep.

Russia-i military campaign anentsü memulungra timtem tulu alitsü ta Trump-i shia lira ser iba atema Starmer-ia US lenir nem tenüngsang agütsü.

"Küm asem dak tema raraba nung tangatettep kati arutsü lenmang mali ta ni Tir Trump dang shia lir. Aser tangbo maongka lir, kechiaser tiri kanga meranga inyaker," ta Starmer-i Bodhbarnü ashi.

Hokulbarnü Alaska nung Trump aser Putin senden amentsü aliba nung Zelenskyy madenba ajanga Kyiv temulung anisüngzüik mangur. Starmer aser danga European lenirtemi Ukraine tarutsü indang jembishinü ajunga nung par adentsüla ta shijen ashir.

Alaska senden nung asaa Zelenskyy mejaok asü ta asüngdang dang, "Masü, yamaji masü," ta Trump-i langzü aser iba sülen Ukraine lenir den senden amentsü ta ashi.

US tiri rara anentsü asoshi litsü-lika melenteptsü indang lemsatepa liasü. Putin-i Donbas region nung tanüngba tesemtem Ukraine dang meshir südi ta amanger, koba Zelenskyy-i magizüker aser Ukraine indang constitution nung litsü-lika agütsütsü memelar ta ashir.

Starmer den France Tir Emmanuel Macron, German Chancellor Friedrich Merz nungeri sangdong ka nung, tashiyim amshia international borders memelenshitsüla, ta shia lir.

MULUNGNEN PELA LEMSATEPER

ASO :
21.02.1965



ASÜ :
11.08.2025

"Shibai Tematiba jenokdak alir, pai ajak Takoksang akhümpok nung alitsü"

Onoki teti meima aliba ojala asür **Alemsola** (Longsa), la shirang yipden nung aliba mapang nungi akümüli wadang tembanga aruba anogo tashi kija, kibong aser lokti shirnokisa nübu, rongsen, shisatsü aser sarasadem agi yaritepogo, nenok ajak dang tebang agi meshitetba tepela iba osang ajanga lemsateper. Nenok mapa tajung asoshi Tsüngremi maneni moajangma.

Temeim Jala, adianu aser kinungertem.

UROLOGY CAMP

Anava Hospital, Mokokchung nung

Visiting Consultant:

Dr. J Gnanaraj

(Urologist & General Surgeon)

Date: 22-23 August, 2025

Contact: 6909534343 / 6909533287

Metetpelatsü asoshi agüja aliba number nung August 21, 2025 tashinung jembiangma.

(Bladder, Kidney Stones aser danga Urinary timtem alirtem asoshi)

Israel-i West Bank settlement sentong tasen sangdong

Maale Adumim, Luroi/August 14 (Agencies): Israel nungeri agia aliba West Bank nung nisung alitsü asoshi ki o jen tasen yanglutsü sentong ka Brehostibarnü Israel indang far-right finance minister-i sangdongogo, koba ajanga tarutsü nung Palestine nunger linük temeja kumtetsü aliba sentongtem raksaja West Bank ya shilem ana kuma sadangtsütsü ta Palestine nunger aser rights groups temi ashir.

September ita Palestine ya linük ka ama agizüksü ta linük aikati sangdongba mapang ka nung iba sentong ya sangdonger alitsü.

Jerusalem anüdoklen E1 ali nung nisung alitsü ki o jen yanglutsü sentong ya küm 20 dak tema shisadanga arur, saka taoba US administration-i memulungba yong anena liasü. Brehostibarnü Smotrich-i Tir Donald Trump aser US ambassador to Israel Mike Huckabee tenüng asang aser taoba mapang kodanga melidangba Israel tembar chichiba lir ta ashi.

E1 sentong ya ano tatembang approval magütsü, koba taruba hopta tashinung agütsütsü imlar. Iba sentong nungya Maale Adumim nung settlement ulushitsü atema nisung alitsü ki 3,500 shi dena

lir, ta Smotrich-i ashi. Bureaucratic mera kar anendaka lir, saka inyakyim kera ora, ita ishika tsüngta infrastructure mapa tenzüksü aser küm ka tsüngta nisung aliba ki yanglu tenzüksü.

Right groups temi iba sentong aitsür. Peace Now-i iba sentong ya tarutsü Israel asoshi aser two-state solution asoshi lendong tulu lir aser iba ya ajanga ano küm aika azüdokshitsü guarantee agütsür ta ashir.

Mongulbarnü sensaksem ka nung Israel Ato Kilonser Benjamin Netanyahu-i Greater Israel mangdang nung pai kanga temulung agütsür ta sangdongba ajanga Palestinian Authority aser Arab linük temi aitsüba mapang ka nung iba sentong ya sangdonger.

Pai iba sentong rasaa mashi, saka iba sentong bhukumer temi Israel-i occupied West Bank kisüng masü saka Arab linüktem shilem kar agütsü ta amanger.

Israel Ministry of Defence indang minister Smortich-i Brehostibarnü ashiba agi, E1 area settlement project nung nisung alitsü ki 3,000 dak tema yanglutsü atema tenders agizüksü, koba agi Jerusalem aser tang Israel nunger ozüng alema arua aliba Maale Adumim sendakteptsü, koba anüdoklen kilometer ishika pilar lir.

Venus Williams nem US Open atema Wild Card agütsüogo



Luroi/August 14, 2025

(Agencies): Taoba mapang US Open anaben koker alila Venus Williams nem taküm iba asayamung tetsür kija asaya atema wild card ka agütsüba sülen la iba asayamung nung 25benbuba asayatsü lir.

Arishi küm 45 tain America tsürla ya temang nung timtem aliba ajanga ita 16 masayai lir tawa asaya tenzükogo, aser la ya asayamung ayongertemi Bodhbarnü wild card agütsüba tetsür asayar ti rongnung densema lir.

Grand Slam kija asaya tenet koker alila Williams ya, 1981 küm Renee Richards (arishi küm 47) sülen US Open nung kija asayartem rongnung tantsütila akümtsü.

Williams taoba küm uterine fibroids entoktsü atema surgery agiba sülen asayamung timba nung masayateti liasü.

La taoba ita nungi asaya tenzükogo, aser la ya Martina Navratilova (küm 47) sülen WTA asaya ka akokba tantsütila kümogo. Lai DC Open mezügbuba round nung Peyton Stearns koka liasü.

Williams-i 2000 Sydney Olympic akokba den Wimbledon kija asaya pongu aser 2000 aser 2001 US Open koker lir.

1997 küm la mezügbuba New York nung asayaba mapang final nung Martina Hingis-i tsükdakja liasü. Kasa mapang nung lai 2002 küma

final nung tenu Serena mekoki liasü.

Lai tang tashi nung WTA titles 49 koka lir aser lai tatamsa 2016 küm Taiwan Open kokogo.

Maneni la taruba hopta US Open tarep temeyoktep asaya nung Reilly Opelka den külemi asayatsü.

France tsür Caroline Garcia nema wild card ka agütsüogo aser iba ya la atema asaya nungi manen tsüngda tatembangbuba Grand Slam asütsü.

America tsür Clervie Ngounoue, Julieta Pareja, Caty McNally, Valerie Glozman aser Alyssa Ahn aser Australia tsür Talia Gibson nunger nema wild card agütsüogo.

Teburtem rongnung America nunger asayar Brandon Holt, Nishesh Basavareddy, Tristan Boyer, Emilio Nava, Stefan Dostanic aser Darwin Blanch nunger nem wild card agütsüogo.

Tatembangbuba wild card ana ya France nunger Valentin Royer aser Australia nunger Tristan Schoolkate na nem agütsü.

UN Open kija asaya main draw ya August 24 nü tenzüktsü.

PSG-i UEFA Super Cup kokogo



Luroi/August 14, 2025

(Agencies): Ligue 1 champions PSG-i Brehostibarnü UEFA Super Cup nung Premier League club Tottenham koka iba takok marok benogo. UEFA Super Cup ya UEFA Champions League aser UEFA Europa League defending champion tsüngda asayar.

Asaya mezügbuba shilem nung Spurs puri goal ka idaktsü aser iba sülen asaya tanabuba shilem nunga parnok goal ka idakja parnok goal ana agi tejakdang liasü, saka PSG puri goal ana ya küptoka penalty asayatsüsa aküm, koba parnoki koka liasü.

Tottenham atema Micky Van De Ven-i minute 39buba nung mezügbuba goal idaktsü aser parnok tejakdang sür asaya mezügbuba shilem tembang. Iba sülen ano minute 48buba nung Cristian Romero-i Tottenham atema tanabuba goal idaktsü.

Ajisüaka asaya tatemtsü lia

Kang-In Lee aser Goncalo Ramos nati minute 85buba aser mapang apuloktsür asayba mapang PSG atema goal kaka idakja goal kasasa aküm aser penalty metsüteptsüsa aküm.

"Ni kanga nema adanger. Onoki kanga jungabo merenemshi, saka football ya shitemang anema aliba dak dang metaloker mali, saka iba ya tekelok amshia asayatsüba asaya ka lir," ta PSG captain Marquinhos-i ashi.

"Goal ana idaktsüba sülen parnok tera zübazülema aküm aser PSG den asayaba mapang iba ama zübazülemtsüji lendong lir," ta paisa shisem.

Kasa mapang nung Tottenham coach tasenbaia pa tebilemba lemsatepogo.

"Alima nung team tajungtiba ka den onoki junga asayaogo ta bilemer. Onoki goal 2-1 maküm tashi minute 80 shika onoki asayanüba ama asayaogo aser iba sülen tia melenshi, saka tangazüktsü aika lir," ta pai ashi.

Cincinnati Open: Sinner aser Aryna na quarterfinals-i iogo

Luroi/August 14, 2025

(Agencies): Cincinnati Open defending champion Jannik Sinner aser Aryna Sabalenka nati Bodhbarnü pei tata asaya koka quarterfinals-i iogo. Sinner-i Adrian Mannarino aser Sabalenka-i Jessica Bouzas Maneiro koka liasü.

Tebur kija asaya nung Sinner-i 6-4, 7-6 (7/4) agi Mannarino akok. Tena tsüngda ghonda asem jungnüa asaya. Tetsür kija asaya nung Sabalenka-i 6-1, 7-5 agi Maneiro madak takok nguogo.

Italy nunger asayar Sinner ya quarter nung Canada nunger asayar Felix Auger-Aliassime den asayatsü, shibai France nunger Benjamin Bonzi 6-4, 6-3 agi kokogo. Kasa mapang nung Sabalenka quarter nung Elena Rybakina den asayatsü.

World number one asayar Sinner, ya Wimbledon akokba sülen tang mezügbuba asayamung ka nung asayar aser pai hardcourt nung asaya 24buba atonga kokogo. Pa taküm tang agi asayamung pongububa nung quarter-final tongogo.

Kasa asayamung tebur kija

asaya nung Alexander Zverev-i round tasembuaba asaya nung 6-4, 6-4 agi Brandon Nakashima kokogo.

Tsüngsang majungba ajanga iba asaya thinenba sülen asaya tenzükshidang Zverev 6-4, 5-4 agi tejakdang liasü. Tena tsüngda minute ana asaya liasü. Zverev round pezübuba nung Toronto finalist Karen Khachanov den asayatsü.

Ben Shelton shibai taoba hopta Toronto nung asayamung kokogo pai Roberto Bautista Agut 7-6 (7/3), 6-3 agi koka round pezübuba tongtetogo.

Tetsür tem rongnung third seed asayar Iga Swiatek aser tebur tem rongnung seventh seed asayar Holger Rune na tzünglu agi minprong masü tsüngda quarter-final-i ir liasü. Wimbledon champion Swiatek-i Sorana Cirstea 6-4, 6-3 agi koka liasü.

Kasa mapang nung Frances Tiafoe teberem nung timtem aliba ajanga masayatetteüsa akümba sülen Rune quarter-final-i iogo.

Tanga asaya ka nung Magda Linette-i 7-6 (7/5), 3-6, 6-3 agi fourth-seed America tsür Jessica Pegula kokogo.

Bournemouth defender Zabarnyi PSG nung denogo



Luroi/August 14, 2025

(Agencies): Paris St-Germain-i Bournemouth defender Illia Zabarnyi pound million 57 agi alizükogo.

Ukraine nunger centre-back shibai küm pongu atema tenangzüktepba yangluogo, pai ashiba agi, pa alima nung project tajungtiba aliba club tajungtiba nung denogo.

European champions PSG yagi pa atema mezüng pound million 54.5 agütsü aser iba sülen performance dak sendakba add-ons 2.6 million agütsü.

Zabarnyi ya Bournemouth nung 2023 küm January ita Dynamo Kyiv nungi oa aden

aser club tenüng nungi 86ben asayaogo.

Pai defence nung tongtibang shilem agi aser 2023-24 Supporters' Player of the Season naroküm ngua liasü.

Bournemouth nungi tang transfer window nung Zabarnyi densema defender asemubai club toktsüogo. Dean Huijsen pound million 50 yong Real Madrid nung aden aser Liverpool-i Milos Kerkez pound million 40 agi alizükogo.

Bournemouth pur defence

yanglushitsüsa akümtsü, saka parnok asem ayokba ajanga parnok kanga ajangzükogo.

Zabarnyi ya pound million 24 agi alizük aser Huijsen ta taoba küm Juventus nungi pound million 12.6 yong arua aden. Kerkez-a AZ Alkmaar nungi pound million 15.5 agi alizüka liasü.

Bournemouth-i Zabarnyi melen Lille nungi asayar Bafode Diakite pound million 30 agi alizüktsü mulunga agizükogo.

Tang transfer window nung defender kabosa oatoktsü ta Bournemouth-i imla liasü saka asem tashi aoba ya taoksatsüka, ta source kati ashi.

Diakite-i centre-back nung tawa kabo süngtsütsü aser Kerkez melentsü atema Adrien Truffert pound million 14.4 agi alizükogo.

Kasa mapang nung goalkeeper Djordje Petrovic-i Kepa Arrizabalaga melenogo, shibai Chelsea nungi Bournemouth melen Arsenal-i aotsü shima liasü. Parnokisa, February ita lanur asayar Eli Junior Kroupi alizükogo.

BILEMDANGANG

"Shisabulula kazüba ajanga mapa kecha mekokteter."